

lis Gnovis

■ CANADÀ. Un altri pas pai Popui natifs

Mary Simon, classe 1947, puarte vòs e lidèr dal popul Inuit, diplomatiche canadese e protagoniste te creazion dal «Consei Artic», e je stade nomenade «Governadore gjeneràl» dal Canadà. Cu la sò incarghe, e varà di rapresentà in forme uficiâl la reine d'Inghiltiere, Elisabete II, tal País. Il prin ministri canadès, Justin Trudeau, ch'al à decidût la nomine, al à declarât: «Daspò 154 agns, chest acjadiment al marche une tape impuartante te nestre storie».

■ TRIEST. Une promesse di mantignî

Al è passât un an di cuant che i presidents di Italie e di Slovenie, Sergio Mattarella e Borut Pahor, si son dàts dongje a Triest e sul Cjars par memoreâ i acjadiments plui dolorôs ch'a àn segnât la storie des Comunitâts talianis e slovenis, te ete dai nazionalisims e des ditaturis dal Nûfcent, ma il «Narodni dom» di Triest nol è ancjemò no stât tornât ai Slovencs di Triest, nocate lis impromissions di chês zornadis storichis. Il brusarili de cjase da lis istituzions e des clapis culturâls slovenis de citât juliane, ai 13 di Lui dal 1920, al è salacor il simbul plui dramatic de persecuzion fasside dal popul sloven e un dai spiei plui orents dal razisim talian d'in chei tims.

■ SPILIMBERC. In onôr di Novella Cantarutti

Di cualchi setemane, Spilimberc al onore la poete di Navarons, Novella Cantarutti (1920-2009), ancje cuntune stèle logade tal prât devant de Biblioteche civiche «Bernardino Partenio». L'opare, fate dai arlèfs de Scuole Mosaiciscj dal Friûl dal Cors di perfezionament dal an scolastic 2019-2020, e jere stade presentade dal 2019, intant de presentazion dal libri «La mia casa è sita... Una biografia e alcuni racconti» di Novella Cantarutti, par cure di Rienzo Pellegrini. Il monument di une bande al propon la poesie de Cjantarute «Gent da la Grava», di chê altre al rapresente il domo di Spilimberc, l'aghe e i claps dal Tiliment.



■ SAN FLOREAN DAL CUEI. Crosero di nature e di storie

In grazie dal progjet «Gli ecosistemi e le acque dell'Isontino», inmaneât di «Coop Alleanza 3.0» e coordinât di «Legambiente», cuatri tabelons a permetin, dal mès di Jugn, di scuvierzi i tesaur naturalistics dal Preval, sul Cuei. Chei altris tabelons a son za stâts dedicâts a lis rois di San Canzian, a la roste di Sagrât, al riu Snierdar de mont Cuarine e al Judri. La bonifiche dal Preval e à permetût di creâ, te prime metât dal Nûfcent, une zone agricule cun valòrs estetics e naturalistics particolârs, ch'è jentre in plen te categorie europeane di protezion ambientâl definide «High Value Nature Farmland». Dute l'operazion e il so valôr a son presentâts intal articulo «Il Preval - una verde piana dentro il Collio/Brda», publicât di Sonia Kucler te riviste «Sopra e sotto il Carso» dal mès di Jugn.

Miercus 21	S. Laurinç	Domenie 25	S. Jacum
Joibe 22	S. Marie Madalene	Lunis 26	Ss. Ane e Joachin
Vinars 23	S. Brigjide di Svezie	Martars 27	S. Aureli vescul
Sabide 24	S. Cristine di Bolsene	Il timp	Bielis zornadis di soreli.



Il soreli
Ai 21 al iève aes 5.37
e al va a mont aes 20.49.



La lune
Ai 24 Lune plene.

Il proverbi
No si da al mont un vuarp plui grant
di chel che nol vûl crodi.

Lis voris dal mès
Tignit simpri sot voli pedoi, ruiis, cais e lacais
che a podressin vuastâ i prodots dal ort,
mandant a patràs dut il vuestri lavôr.

Pâs e salût, no «Amx»

*E je tornade
a començâ la proteste
dal grop «No Amx Pâs»*

Al è passât il prin mès, ma a varan di passant sù par jù altris cinc prin ch'a tornin a calâ la pôre e il torment de int tal Friûl di Mieç, causionâts des esercitazioni cuotidianis dai avions di vuere «Eurofighter» e «Amx», rivâts a Rivolt, vie pal mès di Jugn, di Istrana dulà ch'a son tacadis lis voris par regolâ l'aeropuart trevisan dal «51esimo stormo». Il trafic e il sunsûr a son multiplicâts, massime parsore dal cjâf di chei di Bean, di Gnespolêt, di Rivolt, di Vilecjaze, di Vilevarbe e di Visepe (ma i teritoris penalizâts, ce plui ce mancul, a son ducj chei dai Cumons di Basilian, di Bertiûl, di Codroip e di Listize), parcè che tal fra timp al va indevant ancje l'adestrament usuâl des «Frecis tricolòrs».

Dutune cu lis esercitazioni, e je tornade a començâ impretebil la proteste noviolente dal grop «No Amx Pâs» che, dai 3 di Lui, al à tornât a dâsi dongje ogni sabide, devant dal aeropuart di Rivolt. La manifestazion, vierte a ducj i paisans dal Friûl di Mieç e a chei ch'a lavorin pe pâs, e je programade di 18 a 19.

Fra i partesans plui fedèi, a figurin Franco, Rem e Marc Spizzamiglio di Visepe cun Zuanfranc Passone, ch'a son stâts fra i prins a inviâ la proteste dal 1993, cuant ch'a son rivâts a Rivolt la prime volte i «Amx» de aeronautiche militar, cu la lôr innomine di svoladons micidiâi in timp di pâs (cun 14 pilotis muarts in 700 incidents notâts de Procure militar).

«In chê volte, la int e jere une vore inrabiade e la partecipazion e je



Un dai apontaments setemanâi dal grop «No Amx Pâs»

Ogni sabide,
devant
dal aeropuart
di Rivolt,
par fermâ
«Eurofighter»,
«Amx» e «Frecis
tricolòrs»

stade pardabon populâr – al ricuarde Mauro Della Schiava di Listize –. In zornade di vuê, impen, a 'nd è ancjemò tante fote pal fracàs e pe stracarie spropositade di bêçs, ma la int (che magari cussì no si use a gloti dut) si contente di bruntulâ tes ostariis.

Cun dut che i comants militars a àn imprometût che i pilotis «adotteranno, come prassi, le procedure necessarie per abbattere al massimo il rumore e minimizzare i disagi alla cittadinanza», lis esercitazioni a puedin jessi fatis di matine e dopomisdì, ma ancje di gnot, fin 23, gjavâts dis di fieste e sabide. Ma l'incuinament acustic al è dome un dai motifs ch'a sticin la proteste noviolente. «No si rive adore di capî cemût mai che nissun (nancje fra i sindics) nol ten cont dal pericol – al dis Della Schiava –. Cemût mai che, intant dai «Airshow», il public nol pues stâ sot dai avions e cuant ch'a fasin chês

stessis manovris, intant dal adestrament, a puedin svolâ parsore dai nestrîs cjâfs?». Il grop «No Amx» no si contente di manifestâ pal discomut de int dal Friûl di Mieç e la sò proteste e smire di dislidrisâ chê logjiche de dominazion militariste, ch'è je daûr tant dai «Eurofighter» e dai «Amx» che des «Frecis tricolòrs», tant des esercitazioni di Rivolt che des bombis atomichis di Davian. La contestazion, po, si opon a lis «lobby» des armis, ch'a condizionin guviers, istituzions e informazion, gjavant risorsis a la sanitât e a l'economie. «Ogni sabide, si din dongje a Rivolt par proponi une culture e une politiche di pâs ch'a viodin dai puars e dai debii – al declare Mauro Della Schiava –, in grazie di personis impegnadis pe justizie e pe legalitât, ch'a son atentis a la sò Comunitât, restant viertis a chês altris Comunitâts dal mont».

Mario Zili

Peraulis in dismentie par cure di Mario Martinis

❖ RUSINÂ

v. = brontolare rabbiosamente
(da un supposto *ruzire, dal latino rugire "ruggire")
Ma no âstu altri di fâ che rusinâ?
Ma non hai altro da fare che brontolare rabbiosamente?

❖ RUSPI

agg. = scabro, ruvido; brusco, burbero
(dal latino parlato ruspere "cercare")
Tu âs lis mans ruspis, met la creme!
Hai le mani ruvide, metti la crema!
I furlans pal plui a son ruspis.
I friulani per lo più sono burberi.

❖ RUSSAC

s.m. = sacco da montagna, zaino
(dal tedesco ruc sac)
Ce âstu metût tal russac che al pese cussì tant?
Che cosa hai messo nello zaino che pesa così tanto?

❖ RUSSÂ

v. = grattare la pelle; provvedere ai propri malanni; (senso esteso) stropicciare
(voce di origine onomatopeica, collegato con russa "rovo")
Aio di russâti la schene?
Devo grattarti la schiena?
Cui che al à pice che si russi.
Ognuno provveda ai propri malanni.
Tu âs russât la giachete tal mûr.
Ti sei stropicciato la giacca sul muro.

❖ RUTICUTE

s.f. = catenina
(forma diminutiva di rutizze catena di ferro, lunga circa 20 metri, con una staffa ed un gancio alle due estremità, con la quale si congiungono a due a due le sommità delle sbarre anteriori e posteriori del carro rustico. Con le medesime si fissano alle sbarre se si vuole anche le barle o paradòrs)
Metin la ruticute alore!
Mettiamo la catenina allora!